

MEMORIA DECLARACIÓN

Artigo 15.2. da Lei 1/2016, do 18 do xaneiro, de transparencia e bo goberno.

CONVENIO DE COLABORACIÓN ENTRE A CONSELLERÍA DE POLÍTICA SOCIAL E IGUALDADE E A ASOCIACIÓN "SOLIDARIEDADE GALEGA CO POBO SAHARAUÍ" PARA O DESENVOLVEMENTO DO PROGRAMA "VACACIÓNS EN PAZ 2025".

O director xeral de Familia, Infancia e Dinamización Demográfica,

DECLARA:

Que esta Dirección Xeral de Familia, Infancia e Dinamización Demográfica ten previsto formalizar coa Asociación Solidariedade Galega co Pobo Saharauí o instrumento convencional arriba referido por un período de vixencia que abrangue dende a data de inicio de vixencia do convenio ata o 30 de novembro de 2025.

Que o instrumento convencional ten por obxecto:

Contribuír a través da concesión directa dunha subvención ao financiamento por parte da Consellería de Política Social e Igualdade da Xunta de Galicia ao desenvolvemento do programa "Vacacións en Paz 2025", da Asociación Solidariedade Galega co Pobo Saharauí e que ten como obxectivo xeral trasladar a 111 nenos/as saharauís, procedentes dos campamentos de refuxiados en Tindouf (Alxeria), para pasar dous meses do período estival acollidos por familias galegas.

Que existe converxencia de intereses entre as entidades asinantes en orden á consecución do obxecto referido.

Que o instrumento convencional que se pretende asinar se fundamentan no seguinte:

Traslado a Galicia, de xeito temporal, de 111 menores saharauís procedentes de campamentos de refuxiados de Tindouf (Alxeria), ofrecéndolles a posibilidade de coñecer modos de vida distintos ao clima de guerra no que están inmersos acotío



de xeito que iso contribúa á súa formación persoal, e enriqueza as súas formas de comunicación e entendemento.

Que en consecuencia, e tendo en conta os obxectivos perseguidos co programa "Vacacións en Paz", cabe soste que esta actuación constitúe un obxectivo prioritario no marco da planificación económica en materia de cooperación para o desenvolvemento, e correspóndelle á Consellería de Política Social e Igualdade participar no seu desenvolvemento, segundo o establecido no Decreto 139/2024, do 20 de maio, polo que se establece a estrutura orgánica da Consellería de Política Social e Igualdade.

Tamén se considera un obxectivo prioritario para esta consellería o fomento dos acollementos familiares como medida de protección para os/as menores, e considerase que a Asociación Solidariedade Galega co Pobo Saharauí colaboraría neste obxectivo mediante a súa difusión ás familias participantes por ser un colectivo especialmente sensibilizado coas necesidades dos/das menores.

A Xunta de Galicia, a través da Consellería de Política Social e Igualdade, e a Asociación Solidariedade Galega co Pobo Saharauí, comprometida institucionalmente coa infancia, consideran prioritario potenciar este tipo de actuacións e están interesados en cooperar na execución de programas directamente ligados coa consecución do benestar destes menores. O artigo 85 da Lei 10/2021, do 9 de marzo, reguladora da acción exterior e da cooperación para o desenvolvemento, existen ámbitos prioritarios de intervención preferente concentrar os recursos de cooperación, entre os que se atopan: apartado 1.c) "conflitos ou situacións de emerxencia humanitaria", apartado 1.e) "Relacións culturais e históricas coa sociedade galega e cos seus axentes de cooperación, especialmente nos ámbitos lusófono e hispano" e no apartado 2.a) as accións positivas "no exercicio dos dereitos sociais básicos (saúde, educación, alimentación, hábitat e auga e saneamento básico) polas persoas e os colectivos máis pobres e vulnerables".

De conformidade co establecido no artigo 94 da Lei 10/2021, do 9 de marzo, a administración autonómica pode subscribir convenios de colaboración con entidades privadas sempre e cando as actuacións derivadas destes acordos se axusten aos principios e obxectivos formulados na mesma lei e ás prioridades e resultados do Plan director da cooperación galega para o desenvolvemento vixente.

O artigo 84.2.c.2º da dita Lei establece como unha das modalidades de actuación da Cooperación Galega a cooperación económica-financeira no ámbito da acción humanitaria e axuda de emerxencia. Este ámbito de actuación recóllese do mesmo xeito na letra h) do artigo 85 da mesma norma.



O proxecto do V Plan Director da cooperación galega 2023-2026, aprobado polo Consello da Xunta de Galicia, na súa reunión do 2 de marzo de 2023, establece unha serie de prioridades xeográficas, transversais e sectoriais, entre os que se atopa a continuidade do traballo coa Poboación Saharaí entre outras.

No Plan Anual 2025 da Cooperación Galega recóllense os compromisos, os medios de actuación e os recursos orzamentarios do goberno galego para este ano, de acordo coas orientacións establecidas no devandito proxecto do Plan Director e describe os compromisos xa adquiridos ou previstos pola Dirección Xeral de Relacións Exteriores e coa UE, co seu correspondente orzamento, sen prexuízo de que ao longo do ano outros departamentos da Xunta de Galicia entre os que se encontra a Dirección Xeral de Familia, Infancia e Dinamización Demográfica, poidan desenvolver actuacións en materia de cooperación cuxa valorización se realizará ao final do exercicio.

De acordo co artigo 2.1.c) da Lei 9/2007, do 13 de xuño, de subvencións de Galicia, o proxecto financiado ten por obxecto o fomento e desenvolvemento dunha actividade de interese social. Ademais, o artigo 19.4.c) da mesma lei establece que, con carácter excepcional, subvencionaranse aquelas actuacións que acrediten razóns de interese social e humanitario. Así mesmo, o artigo 31.2 –en relación co artigo 55 da Lei 13/2008, do 3 de decembro, de Servizos Sociais de Galicia habilita, por razóns de interese público e debidamente xustificadas, a subscripción de convenios singulares con entidades de iniciativa social debidamente autorizadas para a prestación de servizos sociais cando por razóns humanitarias ou de emerxencia social, ou ben cando pola singularidade das características da entidade, a especificidade dos servizos que presta ou a especial vulnerabilidade das persoas usuarias, non sexa posible ou conveniente promover a concorrencia pública, como é o caso.

A Asociación Solidariedade Galega co Pobo Saharaí na actualidade conta cos recursos humanos e a estrutura necesaria para o desenvolvemento do programa, ademais dunha acreditada experiencia na súa realización, contrastada cos bos resultados acadados ao longo destes anos de colaboración.

Considérase polo tanto idónea a esta Asociación para a execución de dito programa pola a súa experiencia contrastada ao longo destes anos de colaboración e desenvolvemento do programa “Vacacións en paz 2025”.

Tendo en conta que este convenio prevé un pago anticipado polo total do importe da subvención, 100.000 euros, ao abeiro do disposto no artigo 63.3 do Decreto



11/2009, do 8 de xaneiro, polo que se aproba o Regulamento da Lei 9/2007, do 13 de xuño, de subvencións de Galicia, a sinatura deste convenio precisará de autorización previa do Consello da Xunta de Galicia.

Que os intereses converxentes das partes asinantes exclúen o ánimo de lucro, e non poden satisfacerse axeitadamente mediante a celebración dun contrato dos contemplados na Lei 9/2017, do 8 de novembro, de contratos do sector público, pola que se traspoñen ao ordenamento xurídico español as Directivas do Parlamento Europeo e do Consello 2014/23/UE e 2014/24/UE, do 26 de febreiro de 2014, ou doutro instrumento alleo á natureza estritamente convencional.

En atención ao exposto, e a fin de dar cumprimento ao preceptuado no artigo 15.2. da Lei 1/2016, de 18 de xaneiro, de transparencia e bo goberno, estímase xustificado o recurso á sinatura do instrumento convencional que se pretende, con exclusión doutras figuras.

E para que conste, asíñase esta memoria, en Santiago de Compostela, na data da sinatura dixital.

O director xeral de Familia, Infancia e Dinamización Demográfica

Jacobo José Rey Sastre

